

JINEI THEI NAHI TAH'EM

Nenem Kipgen

Kichen hi thil bailam tah ahi. Ahin nunga kisih hi ageisang ji'e. Phat chesa koukit thei ahipoi. Insung nom loutah'a um hi jinei lou sanga hahsa leh genthei umjo ahi. Hijeh'a chu Paul in keibang hin jinei louvin um leochun kalung ahi ati ahi (I Cor. 7:8,9). Jinei ding nahi jongle kino hih'in. Michingin jinei ding mano louvin ima jouse agong tup masa jin ahi. Khangdong hinkho jong sot man jep angaije. Ajeh chu khatvei sehseh khangdong ding nahi ti kihet masatnin.

1. Jinei pha mong mong nahi kal ngahdoh'in. Kimkhat akum lhom jong le jinei dinga pha aumin, khatloi akum tam jongle phalou aume. Kimkhat chu chapang cha jinei ja insung nomtah'a semdoh jong umnante. Ahin chapanga jinei sangin akum kilhit na lunggel pilhinga jinei hin kipana asojoi. Chuleh insung nom lou tampi, nupa kitoh lou tampi, tahsa lam jenga jong damthei lou tampi, chuleh nupa kikhen na hi chapanga jinei jeh ahinomme. America'a chapang valla kicheng holah'a hop 100 na 70 (70%) kikhen na akichajjuve. Chuleh chapanga jinei hin lungthim jong apilhing pon, neile gou lam jong alhasamin, phatsot tah'a ding lung geljong aneipouvin, damthei na jenga jong anuleh acha anigelun adamthei ji pouvin, chapang dehdeh din jong veisetna atame. Bible'a Isaac chu kum 40 in ji anei jin insung nomtah aso doh'e ti imuve (Gen. 25:20).
2. Lungset dih tah ngah'in. Mitam tah melhoi, kihavop jal, kitimat nakon'in akingai ji'ui. Ahin hiche ho hi lungset dihtah ahi nom poi. Mel la kivet ding jong ahinai. Chubanna kidei ding, kingaiding, kilungsetding jong ahi. Chapang kilungset hi atamjo kideichat maimai ahin, amahon lungsetna agelji vangun lungset ahiloujeh'in amangtheijin ahi. Ahin pilhing kilungset vang adaisot in adet theijoi. Kichen masanga chomcha kideija kingai hi tijat umtah ahin, kipana ahasopoi. Hijeh chun naji ding to nakihol/nakidei (engage/courtship) kah hon sung sot sah'in, kingai kah jong hi lha goh hilouva akumma lutsah ngai ahi. Phatsot tah naki ngaina hon sung chu nakihet them to hon naleh Pathen janggop nahi mong hon hinam ti kihetdohna jong ahi. Mu masatpen na kingai kiti hi kideichat bou ahin, hichu iki havopsot teng aumchan, akampao, achonchan imu'a ijah ho'a kon kingailut dihtah hi nam ti akihedoh theije. Hijeh chun lungset dihtah chu mi ihung kiha hetchil tengbou kihedoh ahi.
3. Tahsa le lhagao lama hinkho kistem tup ngah'in. Numei tamtah in ajidingpa judon/kingolsah chu kakichen hon teng angah ding ahi atijiuvin, ahin akichen hon teng ama lungnat na mama ahin, apasalin la anga deh ji poi. Chuleh kimkhat adongman alung lhai phat phatleh judon ngah bang bol, alung neokhat ahung himo teng angai ngai hikit jong aume. Hitobang hochu akichen jouhon teng numei jin alung ato joujing mong ding hinam? Chugoh hilouvin najidia nahol chun athilphalou bol nadei lou chu nakichen hon masangin ngah sah'in. Chuleh nahin lungset tahtah'a nalung alhai ding adei mong mong leh angah jeng ding ahi. Ahin nakichen nunghonna dingin vang koi hih beh'in. Nangjong kitahsan hih'in, ama jong tahsan hih'in. Ahin akingolsah lou, khamna thei nekhalou heltoh nakichen theileh hichu aphapen ahi. Ajehchu mikhatin anabol sa chu kangatai tijongle uichan alohlhah sa anekit jin, vohpi ksil ngimsa bol lah'a akibol kit ji'e (1 Pet. 2:22) kiti bangin khatvei le ale jot nomkit ji'e. Ahin Pathena kipelut, pentah na dihtah neiho vang achuti ji pouve.

Chuleh mipeng thah khat chu mipengthah louto akichen chun alhagao hinkho asuhchat vai thei ahin, amatah jong lhasuh thei ahi. Hijeh chun jidinga nagelpa/nu chu pengthah lou ahileh apenthah nading hangaiton, Pathen henga taopeh jingin, tilkhovin. Chutileh Pathenin alampi hingonpeh nante. Kichen jou vang ngada'in aphai. Loikhatnin hichu kangaleh jinei louva kaum lo tah louding ham tinte. Ahilouleh khattouvin jipha/ahungphat ngah leng geisangkha val loudingham tinte. Nagei sang nunga nalungdei bang jiding namu louva khat toutoh naki motchenna insunga chamna beihella naum sangin, jinei louvin umjon. Pathenin jinei loudinga nagon jong himaithei ahi. Jinei louva Pathen natoh hin Pathen alunglhai theijoi (I Cor. 7:32-33)

4. Tahsa damthei ngah'in. Jinei ding phat kitep nung/jinei dinga nakigel lhah nunga natahsa dammo nan ahin lhut tah'a ahileh nadam thengsel man jinei hih'in, Date fixed sa ahi jongleh postponed joh'in. Ajeh chu naji ding pan natahsa damthei le nahat lai tah adei ahi. Najinei masangin dammo na naneileh kijen dam masan. Numei dammo heu chu tahsa ngaichat na jong alhasamin apasal din lungkimna ahahsan, naonei jong hahsa thei ahi. Na jinei masangin kijen thengin, ajo naji lungkim lelna le insung dinga jong boina hunghintin, theichim jong hung um maithei ahi.
5. Neile gou sumle pai ja naning lhin man jinei hih'in. Tulai insung boi tamtah hi insung vaichat jeh ahi gamtai. Nungah golhan laija kingailutah nungah/gollhang jong kipah tah'in kicheng hon jogle insung neile gou, sumlepai ahung lhahsam teng kipa na adai lhan, sumlepai neilegou gelkhoh nan lungsung adipjin, kinah, kibao apung dohjin, nungsang ngaichatna asoh doh jin, lunglhai na himhim akah honna aumjipoi. Hijeh chun napasal ding chun ama le aji acha kihin sona kham thilkhat beh aboldoh masang ham, ahileh leh nangbeh'in nanei masangin jinei/kicheng hon hih'in. "Ikilungset pouleh na tokhoma genthei tah hijongleh chenkoma kiloljon khom ding ahi" ti ho hi asej abainan, ahin atah'a ito teng genthei chungnung ahi. Insung vaichat jeh'a kinah le kilung nop mo hi ahahsat goh hilouvin, jachat umtah ahi.
6. Insung mite phalna leh phatsahna ngah'in. Nulepaten eiphat sah lou mana ilung deikhat toh kijam ding tijong hi Pathen deilou lam le i'insung mite deilou lam ahin, chuleh inu le ipan eideisahna'a che hi thil pha jong ahi. Inu le ipan iphatna ding le inop nading bou agel ahin, ithi nadingu leh igentheina diu imacha agel pouve. Numei le pasal akicheng ding chun amasa penna pasal in insung mite phalna nga masat pending ahi. Numei dinga Pasal te chu ichena ding le ei vekolding, jineina jenga jong ichung thu seiding, manle mol peding ahin, igentheihahsat nichan na kingaina ding ahin, pasal pa nule pa phalna louva che hin eile ei gentheina aki kipen ahi.